



**Broj/Број: 02 –50 –1-67-35/'04
Sarajevo/Сарајево: 23.12.2004.**

**ZAPISNIK
35. sjednice Doma naroda
Parlamentarne skupštine Bosne i Hercegovine,
održane 23. decembra 2004. godine**

Sjednica je počela u 11,10 sati.

Sjednicom je predsjedavao Goran Milojević, predsjedavajući Doma naroda Parlamentarne skupštine Bosne i Hercegovine.

Na sjednici je bilo 13 delegata.

Delegat Hasan Čengić je opravdao izostanak.

Osim delegata, na sjednici Doma naroda bili su: predstavnici Vijeća ministara, predstavnici međunarodnih organizacija i predstavnici sredstava javnog informisanja.

Dom naroda usvojio je sljedeći dopunjeni

DNEVNI RED

1. Odgovori na delegatska pitanja i delegatska pitanja
2. Usvajanje zapisnika sa 34. sjednice Doma naroda
3. Prijedlog zakona o izmjenama i dopunama zakona o uvozu i izvozu oružja i vojne opreme – drugo čitanje
4. Izvještaj Zajedničke komisije o nastojanju za postizanje sporazuma o identičnom tekstu Zakona o osnivanju Izvozno-kreditne agencije BiH (IGA)
5. Zahtjev Vijeća ministara za razmatranje Prijedloga zakona o porezu na promet proizvoda i usluga po hitnom postupku, u skladu sa članom 99. Poslovnika
6. Zaključak u vezi pregovora o granicama i prometu ljudi i roba između Bosne i Hercegovine, Republike Hrvatske i Srbije i Crne Gore – delegat Tomislav Limov
7. Autentično tumačenje člana 29. stav 2. Zakona o slobodnim zonama u Bosni i Hercegovini

Prije prelaska na dnevni red delegat Boško Šiljegović izabran je za člana Zajedničke komisije za usaglašavanje teksta Prijedloga zakona o porezu na dodatnu vrijednost (PDV) umjesto delegata Nadeta Radovića.

Ad-1. Odgovori na delegatska pitanja i delegatska pitanja

Odgovora na delegatska pitanja nije bilo.

Delegat Tomislav Limov je postavio sljedeće pitanje Vijeću ministara:

1. Koliko, kada i gdje na području Bosne i Hercegovine je tijekom 2004. godine izvršeno razbojničkih krađa, odnosno otmica novca prigodom transporta ili u objektima banaka, osiguravajućih društava, kladionica i drugih subjekata.
2. Kojim bankama, osiguravajućim društvima, kladionicama i drugim pravnim subjektima u Bosni i Hercegovini je i u kojim količinama od strane razbojnika otet novac u 2004.godini.
3. Koje zaštitarske firme su osiguravale, odnosno bile u pratnji transporta novca prigodom razbojničkih otmica
4. Koliko je novca vraćeno i koliko je kriminalaca, nositelja razbojničkih otmica novca do sada procesuirano i kakve su im kazne izrečene od strane mjerodavnih sudova
5. Je li i kakva je odgovornost do sada utvrđena za djelatnike subjekata čiji je novac otiman od strane razbojnika i je li i na koji način utvrđena odgovornost djelatnika koji su kao zaštitari trebali spriječiti razbojnike otmičare?

Ad-2. Zapisnik sa 34. sjednice Doma naroda

Zapisnik 34. sjednice Doma naroda jednoglasno je usvojen uz ispravku delegata Osmana Brke da je zadovoljan što je dobio odgovor, ali samim odgovorom nije zadovoljan.

Ad-3. Prijedlog zakona o izmjenama i dopunama zakona o uvozu i izvozu oružja i vojne opreme – drugo čitanje

U raspravi nije niko učestvovao.

Dom naroda jednoglasno je usvojio u drugom čitanju Prijedlog zakona o izmjenama i dopunama zakona o uvozu i izvozu oružja i vojne opreme sa sljedećim amandmanima:

Amandman 1.

U članu 13.a.tačka b) mijenja se i glasi:

“b). Ministarstvo objavljuje I ažurira “Listu proizvoda” u “Službenom glasniku BiH.”.

Amandman 2.

U članu 13.a.tačkac). mijenja se i glasi:

“c). Tehnologija podrazumjeva specifičnu informaciju neophodnu za razvoj, proizvodnju I upotrebu proizvoda dvojne namjene, koja može biti u obliku tehničke pomoći (usluge konsultacija I može uključiti transfer tehničkih podataka) ili tehničkih podataka (detaljni planovi, proizvodni nacrti I specifikacije napisane ili zabilježene na drugim medijima I napravama kao što su disk, traka, ROM-read only memory).”

Amandman 3.

U članu 13.a. tačka d). mijenja se i glasi:

“d). Uvozom, u smislu ovog zakona, smatra se ulazak proizvoda dvojne namjene i tehnologija na teritoriji Bosne i Hercegovine u skladu sa zakonom o carinskoj politici Bosne i Hercegovine.”

Amandman 4.

U članu 13.a.tačka e). mijenja se i glasi:

“e). Tranzitom, u smislu ovog zakona, smatra se transfer proizvoda i tehnologija dvojne namjene kroz teritoriju Bosne i Hercegovine, u skladu sa Zakonom o carinskoj politici Bosne i Hercegovine.”

Amandman 5.

U članu 13.a. tačka f). mijenja se i glasi:

“f). Izvozom, u smislu ovog zakona, smatra se procedura izvoza i ponovnog izvoza proizvoda dvojne namjene propisana Zakonom o carinskoj politici Bosne i Hercegovine.”

Amandman 6.

Tačka 9. člana 13.b., briše se.

Amandman 7.

Član 13.e. mijenja se i glasi:

“U cilju provođenja režima kontrole uvoza, izvoza i tranzita oružja, vojne opreme i roba dvojne namjene, a u skladu sa čl. 6., 7. i 13.b., Ministarstvo vanjskih poslova će objavljivati ažuriranu Listu zemalja pod embargom Vijeća sigurnosti UN-a, OSCE-a i Komisije Evropske unije.”

Budući da je Zakon usvojen u različitom tekstu u odnosu na Predstavnički dom, Dom naroda imenovao je sljedeće delegate za članove Zajedničke komisije za nastojanje postizanja sporazuma o identičnom tekstu Zakona:

- Mustafa Pamuk
- Branko Zrno
- Vinko Radovanović

Ad-4. Izvještaj Zajedničke komisije o nastojanju za postizanje sporazuma o identičnom tekstu Zakona o osnivanju Izvozno-kreditne agencije BiH (IGA)

U raspravi nije niko učestvovao.

Dom naroda jednoglasno je usvojio Izvještaj Zajedničke komisije oba doma o postizanju sporazuma o identičnom tekstu Zakona o osnivanju Izvozno-kreditne agencije BiH (IGA)

Ad-5. Zahtjev Vijeća ministara za razmatranje Prijedloga zakona o porezu na promet proizvoda i usluga po hitnom postupku, u skladu sa članom 99. Poslovnika

U raspravi su učestvovali: Velimir Jukić, Goran Milojević, Tomislav Limov i Mustafa Pamuk.

Dom naroda jednoglasno je usvojio Zahtjev Vijeća ministara za razmatranje Prijedloga zakona o porezu na promet proizvoda i usluga po hitnom postupku, u skladu sa članom 99. Poslovnika sa sljedećim zaključcima:

1. Rokovi za razmatranje Prijedloga zakona o porezu na promet proizvoda i usluga i Prijedloga zakona o akcizama u Bosni i Hercegovini u Domu naroda skraćuju se kako slijedi:

- Nadležna komisija završit će komisijsku fazu po prijedlozima zakona 28. decembra 2004. godine i Domu podnijeti Izvještaj
 - Sjednica Doma zakazat će se za 29. decembar 2004. godine, na kojoj će se razmatrati prijedlozi ovih zakona.
2. Amandmani na prijedlog zakona, koji se podnose po članu 89. Poslovnika mogu se podnositi do početka sjednice Doma
 3. Zadužuje se nadležna komisija da svoje aktivnosti koordinira sa nadležnom komisijom Predstavničkog doma, a sekretar doma da sa sekretarom Predstavničkog doma koordinira sjednice domova, koje bi se održale isti dan

Dom naroda takođe je usvojio sljedeće zaključke:

- Dom naroda Parlamentarne Skupštine BiH odbacuje svaku odgovornost za kašnjenje u donošenju Zakona o akcizama u Bosni i Hercegovini i Zakona o porezu na promet proizvoda i usluga budući da je Vijeće ministara BiH zakone dostavilo kasno, te se nisu mogli uklopiti u poslovničke rokove za njihovo usvajanje i donošenje.
- Dom naroda Parlamentarne Skupštine BiH naročito smatra neprimjerenim način komuniciranja pojedinih članova Vijeća ministara s OHR-om putem pisma u kojem se neistinito i krivo informiše OHR, te se odgovornost za kašnjenje u donošenju Zakona o akcizama u Bosni i Hercegovini i Zakona o porezu na promet proizvoda i usluga prebacuje na Parlamentarnu skupštinu BiH, odnosno Dom naroda.
- Dom naroda Parlamentarne Skupštine BiH smatra da je ovog puta izostala potrebna komunikacija između Vijeća ministara i Parlamentarne skupštine BiH, kojom bi se otklonili svi evidentni propusti i nesporazumi vezani za rokove donošenja navedenih zakona. Na taj način, po ovom pitanju, ne bi bilo potrebe za komuniciranjem pojedinih članova Vijeća ministara sa OHR-om, a naročito ne bi bilo potrebe za pozivanjem Visokog predstavnika da nametne Zakon o akcizama u Bosni i Hercegovini i Zakon o porezu na promet proizvoda i usluga.
- Kolegij Doma naroda i Kolegij Predstavničkog doma Parlamentarne skupštine BiH dogovorili su dinamiku svih koraka parlamentarne procedure i usklađeno djelovanje oba doma, kako bi ukupna procedura bila završena i zakoni usvojeni do kraja decembra 2004.

Ad-6. Zaključak u vezi pregovora o granicama i prometu ljudi i roba između Bosne i Hercegovine, Republike Hrvatske i Srbije i Crne Gore

U raspravi su učestvovali Đoko Pajić i Tomislav Limov.

Dom naroda jednoglasno je usvojio sljedeći Zaključak u vezi pregovora o granicama i prometu ljudi i roba između Bosne i Hercegovine, Republike Hrvatske i Srbije i Crne Gore:

Dom naroda Parlamentarne skupštine Bosne i Hercegovine traži od Predsjedništva BiH i Vijeća ministara BiH da u roku od 60 dana pripreme i dostave Informaciju o dosadašnjem tijeku i rezultatima aktivnosti na utvrđivanju državne granične crte i rješavanju pitanja pograničnog prometa ljudi i roba između Bosne i Hercegovine, Republike Hrvatske i Državne zajednice Srbije i Crne Gore.

Ad-7. Autentično tumačenje člana 29. stav 2. Zakona o slobodnim zonama u Bosni i Hercegovini

U raspravi nije niko učestvovao.

Dom naroda jednoglasno je usvojio Autentično tumačenje člana 29. stav 2. Zakona o slobodnim zonama u Bosni i Hercegovini

Sjednica je završena u 11,55 sati.

Sastavni dio ovog zapisnika je neautorizovani transkript sjednice.

**SEKRETAR
DOMA NARODA
Jadranko Tomić**

**PREDSJEDAVAJUĆI
DOMA NARODA
Goran Milojević**